

AVP:

Danki na Shon A Eman y 2147 firmante Aruba su bos a wordo scucha



ORANJESTAD – Te cu **januari 1986 Aruba tabata forma parti di Antias Hulandes. Bispo di aña, dia 31 di december 1985 pasando pa 1 di januari 1986 Aruba a bira un pais riba su mes den Reino, un pais soberano, aparta di e otro islanan pa loke ta gobi-erno central cu lasonan directo cu Hulanda, pero na mes momento manteniendo nos lasonan historico, cultural y familiar cu nos islanan ruman den Antias Hulandes.**

Porfin Aruba a haya loke su hendenan tabata lucha p'e for inicio di siglo 20, ora cu bao guia di Henny Eman sr. (1887-1957) bosnan a cuminsa lanta pa separacion, cu despues di Segunda Guerra Mundial a bira mas fuerte y a bay den historia como e 'lucha pa autonomia' of 'separacion'. Un lucha cu a dura decadan y cu no a bay sin sacrificio.

Un poco di e historia di nos Status Aparte

Entre 28 di september 1947 y 11 di januari 1948, e lidernan politico Henny Eman sr., su yiu Albert 'Shon A' Eman y Aristides Wever a organisa no menos cu 42 encuentro na tur parti di Aruba. Resultado di e encuentronan aki tabata un peticion cu nomber y firma di 2147 hombernan Arubiano. E Arubianonan balente aki a duna muestra di e determinacion di un pueblo pa yega na su soberania. E protesta no tabata algo nobo den e temponan ey, pero si tabata e prome bes cu Arubianonan a tuma un posicion fuerte y esaki a duna su frutonan. E hoben politico Shon A Eman a haci entrega di e peticion na su Mahestad Reina Wilhelmina na aña 1948. Algun siman despues, riba 18 di

maart 1948, el a convence Corsou y Surnam durante e Conferencia di Mesa Rondo cu Aruba tin e derecho di tin un posicion extraordinario dentro di Reino. E mocion di 18 di maart 1948 y e peticion cu nomber di e firmantenan a bira e fundeshi di nos autodeterminacion dentro di Reino Hulandes y a para na cuna di nos Status Aparte. E monumento 18 di Maart na un homenahe na tur esnan cu den e periodo entre september 1947 y maart 1948 a construi e fundeshi aki.

Shon A Eman

Na luna di december 1941 un politico hoben di 25 aña a aparece den Raad van Politie. Su nomber tabata Cornelis Albert 'Shon A' Eman, yiu homber di Henny Eman sr. Na cuminsamento Shon A tabata mester a debati su so den e Raad contra hendenan manera gezaghebber Wage-makers y dokter Dussenbroek, pero na 1945 el a bin haya ayudo di e comerciante y politico bakia Aristides Wever. Hunto nan a para firme. Despues di Segundo Guerra mundial a cuminsa mundialmente un periodo di decolonisacion. Cu na Aruba e grito pa ta 'baas nos mes cas' a bira mas fuerte no tabata un sorpresa, ya cu esey tabata un deseo ferviente di tur Arubiano e tempo ey. Na 1946 Shon A Eman a hiba un defensa di e vision Arubano riba e plan di Corsou: "Aruba zal nimmer genoeg nemen met een aan het eiland Curacao ondergeschikte plaats in zijn nieuwe staatsrechtelijke structuur. Wij wensen als broer en zus naast het eiland Curacao samen te werken, tot heil van heel het gebiedsdeel, doch we zullen met klem protesteren als eventueel de oude toestand zal blijven

gehandhaafd"

Separacion

E lucha pa separacion tabata wordo hiba den Raad van Politie. For di aki Shon A Eman, Aristides Wever y miembro di Parlamento Henny Eman sr. tabata trece e pueblo hunto. E grupo tabata organisa reunionnan na Oranjestad, Santa Cruz, Savaneta y San Nicolas. Riba 30 di juli Raad van Politie a yega hunto y 95 habitante prominente a haci entrega di un peticion unda ta pidi pa trece un cambio den e relacion estatal entre Aruba y Corsou y duna Aruba un estructura independiente cu ta cay directamente bou di Corona Hulandes. Un cantidad di manifestacion a tuma luga pa pone enfasis riba e deseo di e pueblo di Aruba. Riba 7 di september e accionnan aki a yega nan punto culminante cu e demostracion mas grandi di e tempo ey. Mas di 2500 Arubiano a subi caya pa demostra cu pancartanan cu tabata bisa e.o. 'Los van Curacao door totale afscheiding', 'Aruba een met Nederland', 'Aruba zelfstandige status' y 'Leve de Koningin, leve de Regentes'. E peticion y entrega di mocion riba 18 di maart 1948 Despues di e manifestacion masal aki grupo Eman a start un accion grandi di firma. No menos cu 42 reunion a tuma luga y a colecta 2147 firma. Tur e hendenan aki, hombernan Arubiano humilde di curason, tabatin un cos en comun. E deseo incondicional di un Aruba los di Corsou, pero cu lasonan estrecho cu Hulanda. E Arubianonan determina aki tabata esnan cu a forma e base pa e autodeterminacion di Aruba.

Riba 14 di januari 1948 Shon

A Eman y Juancho Irausquin a biaha pa Hulanda. Na Aruba tabata reina un optimismo grandi. Dia 27 di januari, e fecha riba cual e conferencia di Reino a cuminsa, Padu Lampe a traha un poesia cu ta duna muestra di e sentimentonan cu tabata biba e tempo ey. Riba 18 di maart 1948, durante e ultimo reunion di Mesa Rondo, Shon A Eman a haci entrega di e mocion historico y a tira un discurso ferviente, cu

nunca mas a perde su balor, ni su actualidad. Shon A Eman a papia riba locual awe nos ta yama e fondo di solidaridad. E mocion a wordo acepta. Na Aruba a reina gran alegria. Aruba su bos a wordo scucha y e lucha reconoci, aunke cu Status Aparte no a bin mesora. A dura te 1986 prome cu Aruba a haya su Status Aparte. E yiu mayor di Shon A Eman, Henny Eman jr. tabata e prome Prome Minister di Aruba.